

Radunanza generala dal CAS EB, ils 15 avrigl 2005, al restorant Bellavista a Ftan

.....

Nossa presidenta Gianna Rauch Poo driva la radunanza generala a las 20.00 h e po salüdar a 38 commembras e commembers chi han chattà la via per gnir a nossa radunanza generala. Davo divers salüds specials bivgnainta ella a Balsler Derungs, il vicepresident dal cumün da Ftan chi da il bivgnaint official dal cumün e'ns beneventescha in seis restorant Bellavista. Divers commembers s'han laschè s-chüsar o a bocca o in scrit. Sco dombravuschs funcziunan Michel Rauch e Simon Viletta.

Tractandas:

1. Protocol da la radunanza generala dals 22.04.04

Il protocol da la radunanza generala dals 22.04.04 a Zernez vain prelet ed approvà cun applaus.

2. Rapport da la presidenta

Gianna rapportescha sur da sia lavur sco presidenta dal CAS EB. La suprastanza ha fat diversas tschantadas. Pro las radunanzas dals presidents dal CAS nun ha ella pudü ir ne a Berna e neir bircha a Cuaira, causa ch'ella eira al spital cun sia figlia.

No vain laschè restampar il prospect da nossas chamonnas cun la nouva fotografia da la chamonna Lischana. Il prospect va davent sco panins frais-chs.

Per l'inauguraziun da la chamonna Lischana han tut raduond 120 persunas la via suot ils peis. No vain gnü ün bun rebomb eir aint illas media e la pressa. La renovaziun da la chamonna es gratiada fich bain.

No vain fat müdada cun il archiv davent da Rico Luppi oura Stada illa chasa da scoula.

Per quist on chi vain stuvaina ir in tschercha da novs guardians per la chamonna Tuoi. Balsler e Cilgia han dat aint lur desditta. Cun agüd dad inserats speraina da chattar üna buna soluziun.

I circulescha üna glista cun tuot ils nouventrats usché cha Gianna desista da tils preleger. Gianna tils da ün cordial bivgnaint in nossa secziun. Onurificaziuns nu daja ingünas quist on. Ün commember ans ha bandunà per adüna, quai es Flurin Denoth da Ramosch. La radunanza s'adozza in sia memoria.

Gianna ingrazcha a la cumischiun da fabrica da la chamonna Lischana ed a l'architect, als guardia chamonnas da Tuoi, Lischana ed eir a tuots da la Linard. Agüdontas da la lavur cumöna sülla Lischana ed a la festa d'inauguraziun. Als chefs da chamonnas, a la grupp da salvamaint, a la grupp da chans, als manaders dals CAS e OJ cul coach, revisurs da quint ed als redacturs da nossa gazettina e la pagina d'internet.

Gianna ingrazcha als 743 commembers da nossa secziun per lur fiduzcha. Implü ingrazcha ella a tuot la suprastanza per la lavur prestada in nossa secziun. Il rapport da la presidenta vain approvà cun applaus.

3. Rapports dals differents chefs

3.1. Chef da gitas

Christian Wittwer il nouv chef da gitas as preschainta svesa. El ha gnü üna gronda lavur cun l'organisaziun da las differentas gitas. El ha pudü surtour ün bun team da manaders da gitas da seis antecessur. Tuot las gitas han pudü gnir manadas tras sainza accidaints. Dürant la stà d'eiran scrit our 15 gitas e manadas tras sun gnüdas 10. Dürant l'inviern d'eiran quai 4 da 13 gitas scritas oura. L'inviern d'eira cun noschas relaziuns e paca naiv. La prüma gita es stat pür ils 20 da schner. Tuot in tuot es l'interess vi da nossas gitas plütost pitschen. Che es la radschun, faina qualchosa sbaglià? El es avert per propostas.

3.2. Chef da chamonnas

No vain pudü inaugurar la nouva chamonna Lischana in gün. La gestiun da tala ha davopro funcziuna sainza problems. I da amo differentas lavurs da garanzia chi vegnan fattas amo quist on in mai avant cha la stagiun cumainza. Ün cordial grazcha fich a Jon Andrea Könz, a Chasper Planta, a Clà Duri Janett ed eir a Rico Luppi per lur gronda lavur prastada. Fabricas ils prossems ons nu sun previs. Las pernottaziuns aint illas chamonnas d'eiran sur la media dals ultims ons pero bain quant plü bass sco l'on passà cun il record. Fich positiv d'eira l'augmoint da pernottaziuns aint illa Lischana. Ün cordial ingrazchamaint van a tuot ils guardia chamonnas ed impustüt a Balser ed a Cilgia. Ad els duos blers e buns giavüschs per lur avegnir cun lur nouva vocaziun.

3.3 Chef da salvamaint

Giacomin Arquint rapportescha sur da las differentas activitats ed eir sur dals salvamaints cha la gruppa da nossa secziun ha gnü - in tuot 9 cas seris, malavitta eir cun mortoris. Eir la gruppa da chans ha gnü divers salvamaints e cuors. A tuot quels chi han güda d'ürant l'on scuors pro salvamaints, pro l'organisaziun, pro cuors ed oter plü ingrazcha Giacomin fich.

3.3. Chef OJ

Chasper Alexander Felix fa seis rapport a man da bellischmas dias fattas d'ürant l'on scuors. La partecipaziun dals giuvenils a las differentas gitas es exemplaric. In media piglian part 15 giuvenils a mincha gita dal OJ. Tuot las gitas sun gnüdas manadas tras sainza accidaints. In tuot on ha fat l'OJ d'ürant 53 dis gitas, quai voul dir ün di l'eivna. El ingrazcha als manaders ed a tuot ils agüdants chi sustegnan las duos gruppas da l'OJ. A Chasper Alexander va ün grazcha fich per l'ultim cudeschin ch'el ha fat.

Ils differentes rapports vegnan fats bun cun applaus.

4. /5. Rendaquint 2004 e rendaquint chamonna Lischana

Jon Andrea Könz rapportescha sur il rendaquint da la chamonna Lischana

La radunanza generala dal 2002 vaiva fat bun ün preventiv per il fabricat da la chamonna Lischana da frs. 810'300.--. Il quint final ha serrà cun frs. 959'745.--. Quist surpassamaint da raduond frs. 155'000.-- d'eira gnü avisà a la radunanza generala dal 2004 ed es stat causa investiziuns inplü (vaira suotvart).

implants solars per la forza	frs.	56'000.--
tualetta mecanica	frs.	41'000.--
tanc nouv per l'aua	frs.	12'000.--
paravent porta d'entrada	frs.	12'000.--
chadafö professiunala	frs.	34'000.--
<hr/>		
Total surpassamaint	frs.	155'000.--

A regard quist surpassamaint haja dat eir differentas discussiuns cun la suprastanza ed eir cun l'architect. Jon Andrea sperescha cha eir la radunanza generala detta dis-charg als respunsabels. El ingrazcha a l'architect Rico Luppi, a Chasper Planta ed a Clà Duri Janett per lur buna e gronda lavur.

Il rendaquint e'l rapport dals revisuors sun publichats aint illa gazettina. Andri manzuna in pustüt cha per il fabricat da la chamonna vaina survgni da differentas varts raps. Il quint da gestiun 2004 muossa ün s-chavd da frs. 380.27. La facultà netta als 31.12.2004 s'abassa sün frs. 198'300.74. Adonta dal fabricat da la chamonna es la situaziun finanziala da nossa secziun fich buna.

6. Dis-charg a la suprastanza da tuots duos quints

Il revisuors ingrazchan in lur rapport al chaschier per sia gronda lavur e propuonan acceptaziun dal quint da la chamonna da Lischana e dal quint dal 2004. Tant il rendaquint da la chamonna Lischana sco eir il rendaquint 2004 vegnan acceptà unanimamaing e dat dis-charg a la suprastanza.

7. Contribuziun annuala

Per la contribuziun annuala dal 2005 propuona la suprastanza il seguaint

frs. 28.--	l'on per singuls commembers
frs. 56.--	l'on per famiglia
frs. 15.--	l'on per giuvenils in famiglias na commembers

La radunanza generala fa bun quista proposta.

8. Onurificaziuns

Quist on nu daja ingünas onurificaziuns, quai tenor la glista dal SAC.

9. Varia

- La reuniun d'ascensiun dal SAC vain manada tras ils 5 e 6 da mai in Bregaglia.
- In sun avant mans amo gilets per frs. 60.-- al toc.

- Ils 20 e 21 lügl vain manà tras ün toc theater cun il nom „Bergfahrt“ sülla chamonna Tuoi e Lischana.
- Ün grond grazcha fich a Mario Rauch per tuot las gazetinas e a Chasper Alexander per l'ultima gazetina. No eschan amo adüna in tschercha da nouvs redactors. Mario Rauch es eir da quinder inavant respunsabel per nossa pagina d'internet.
- La Silvretta Allianz cumbatta cunter ün runal sül piz Val Gronda. Jon Andrea da üna cuorta spiegaziun su da l'istorgia fin qua. Eir la secziun da la chamonna dal Heidelberg es cunter il runal. Nossa secziun as solidarisescha cun la secziun. Da la vart da Scuol nun esa previs per ils prossems 20 ons ingüna colliaziun tanter la Motta Nalus e la regiun dal Samignun / Ischgl. La suprastanza ha l'incumbenza da tour sü contact cun la Silvretta Allianz, sar Dr. Scholz per dar tras eir nossa posiziun.
- Aint illa Val Lavinuoz penda sül glatscher dal Tiatscha üna sua. Chi tilla ha invlidà?
- Per la finischiun da la radunanaza generala s'annunzchan Aita e Thomas Dietrich, ch'els surpigliessan gugent la redacziun per la gazetina da quinder inavant.

La presidenta sera la radunanza a las 22.10 e giavüscha a tuots ün bun arriv a chasa.

Samedan, ils 21 schner 2006

Per il protocol:

Corsina Feuerstein Betschart